

Vibrashon di Amor ya ta riba mercado cu poesíanan amoroso

ORANJESTAD - Ayera mainta for di 11'or te cu mas o menos 1'or di merdía, famia, amigo y conocirnan a brinda hunto cu Sra. Belen Kock-Marchena pa asina yamá bon-biní den e mundo literario.

Ki bunita tabata e temporada cu Belen poco poco tabata deleitá su poesíanan pa público. Poesíanan na unda Belen tabata expresá amor, cariño, preocupacionnan y alegría.

Belen Kock-Marchena a nace na Boneiro na aña 1942 y ta biba aki na Aruba for di 1948. Pa basta aña caba Belen ta scirbi poesía y varios di e poesíanan el a yega di presentá na eventonan cultural tanto na Aruba como na Hulanda.

Un di e poesíanan cu a hala basta atencion na Aruba y cu a cosechá éxito tambe na Corsow y Boneiro, tabata esun di "Juffrouw, ik heb mijn boter meegebrengt".

Y asina tambe Belen ta dicidí di haci un coleccion di su poesíanan cu ta forma e Vibrashon di Amor. E coleccion aki ta encerrá Belen su pensamentonan, su preocupacionnan y naturalmente su sentimentonan



di amor, felicidad y gratitud.

E mainta aki tabata uno hopi bunita na unda a tuma lugar e bautismo di e buki bunita aki. Durante e ceremonia Genevieve Garcia a baila un cancion inmensamente bunita.

Sr. Dolfi Kock tabata padrino y Filomena Wong tabata e feliz madrina. E jiuñan di Belen, esta Richie y Rafi a para testigo di e bautismo aki.

Despues a sigui un momento na unda cu Belen a deleitá algun bunita poesía pa e público cu a sa di respaldé cu su presencia. Hopi bunita organizá ya cu durante cu Belen tabata declamá poesía tabatin música

den background y tambe acompañamento riba instrumento di amigonan.

Despues a sigui un rato di reunion social na unda tur presente por a felicitar Belen cu e tremendo logro aki.

Bon Dia Aruba kier a manda palabra di felicitacion pa Sra. Belen y alavez deseá Belen tur clase di éxito cu e bunita coleccion aki. Cu Señor drama su bendicion ricamente riba Tia Belen! □